

الفاجومي

الغريب.. ابن فاطمة

- بعد موت أبوي علي ترك فراغ وكان فرصه لظهور الصراع بيني وبين « غريب ابن فاطمه ».
- قالت لي أمي: أقطع لسان اللي يناديك باسم فؤاد ابن هانم.
- جلدى بلع أملاك القصر وعوضهم في أملاك الدولة.

obseikan.com

بعد موت أبويا على الشمروخ.. ساب مطرحه فاضى تحت المنجايه الهنديه فى جنية البيه الشوادفى وساب حسره فى قلوب وعيون محبينه.. خصوصاً إحنا الشباب اللى كنا دايماً حوالياه.. نعاكسه عشان يشتمنا ونضحك.. ونسأله عشان يجاوبنا ونفهم.. وكنا بنلاقى فى حضنه الونس والدفا اللى ماكانش بتلاقيهم فى البيوت.. من أول سراية العمده لحد أوضه ستك سعده اللدايه.

الأحلى من دا كله والأمتع كانت نوادره وتشنيعاته الحراقه اللى كان بيصبها أساساً على دماغ العمده والمشايخ وشيخ البلد وشيخ الغفر وشيخ الجامع وشيخ المنسر اللى هو زى ما بيقدمه أبويا على:

- أبوعبد الله ولا غيره.. حرامى التموين.. قليل الدين الضلالى مقطوع اليد اللى بال العالم فى كرشه مساحه وقباله ويبيع قوت الغلابه للحراميه عينى.

كان أبوعبد الله صاحب محل البقاله الوحيد فى العزبه وكان مسمر غطا صندوق جزم كرتون على باب المحل وكاتب عليه بقلم كويبا بالخط النسخ «ممنوع الشكك قطعياً بمناسبة الحرب».

والمدهش إن الساده الحراميه اللى كانوا الهدف المباشر لتشنيعات ونوادر أبوكو على الشمروخ كانوا نشطين جداً فى ترويح هذه التشنيعات

وهذه النوادر عن طريق الروايه والنقل.. يمكن عشان كل واحد فيهم يثبت للناس إنه مش هو المقصود بالكلام دا.

أما متوسطى الحال فكانوا بينقلوا أخبار ونوادر أبويا على من باب التعالم والوجهه شوف التفاهه.

بذمه النبى حصل إلى يومنا هذا جهاز إعلام مجانى بيشتغل بالكفاهه دى؟

أبويا على كان بالنسبه لى شخصياً حضن دافى أمين.. على الأقل باستخبي فيه

من بطش عبد العزيز أخويا الرهيب اللي كان نازل في ضرب عمال على بطل.
مره قال له قدام سراية العمده:

- إنت ياد يا عويل يا هايف كل ما صرمك يحرقك تعمل راجل وتنزل ضرب
وتلطيش في اخواتك اليتامي؟.. طب ماهم الحراميه اللي كلوك إنت وأمك
وإخواتك قدامك أهم.. ورينى شطارتك.. وإن كان فيك الله يعافيك.

راخر من يومها بطل يضربني برا البيت خوفاً من أبويا على الشمروخ.
وكان أسعد لحظات أبويا على الشمروخ هي اللي بنقضها حواليه واحنا بنسمع
حواديته الجميله الغريبه وخصوصاً حدوده الجنيه الأميره بنت ملك الجن لاحمر..
اللي عشقت أبوك على وهربت معاه ليلة دخلتها على ابن عمها الأمير عيروض ابن
ملك الجن لاصفر وشالت أبويا على - على ضمهرها وحلت ضفايرها وقالت له:
- اتشعلق يا حبيبي.

وطارت بيه سبع تيام بسع ليالى ونزلوا سوا في القصر المسحور وقعدوا ياكلوا
لقمة المحاياه ويشربوا لبن العصفور اللي كانت الجنيه مخبياه في صدرها بقت تشرب
م البز اليمين وهو يشرب م البز الشمال لحد ما كان فاضل له مصتين ويتلحس ويبقى
من أهل تحت الأرض وتجوّز له الجنيه بشرع الله وسنه نبي الله سليمان.. وإذ بالحيطه
تنشق ويدخل منها الصعصعان وزير أبوها وحواليه الحاشيه وعسكر الجن لاحمر
ويقبضوا عليهم وتصرخ الأميره:

- إقتلوني أنا وسيبوا حبيبي.

وإذا بالوزير الصعصعان ينزل بالكف على وشها ويقول لها:

- إخرسى يا فجره.. (ويجى يضرب أبوك على كف يروح أبوك على مهيفه
فيضرب الهوا).. ويقوم العسكر بتكتيف أبوك على ويغموه عشان مايشوفش حكيم
الجان وهو بيكشف عليها وبعد فتره قلق يصرخ حكيم الجان:

- يا سليمان يا نبي الله.. العفو والسماح.. صاغ سليم يا مولانا الوزير.. لسه

بختم ربهآ.. صاغ سليم شرف الجن لحرر.. صاغ سليم.

ويهيص عسكر الجن لآحرر ويرقصوا رقصه الشرف.. كل دا وأبويآ على لسه
متغمى ويشكل الوزير محكمه الجن فى لمح البصر ويصدروا الحكم الرهيب على
لسان رئيس المحكمه:

- دم شرف بنات الجن لآحرر غالى.. وإنت صنت الغالى يا على يابن الإنسان..
عليك مليون أمان وأمان.. لا تلدغك حيه.. ولا تخطفك جنيه.. ولا يطرق سكتك
سلطان ولا يلبس جتتك شيطان.. لكن جزاء فعلك الخسيس وعشقتك لبنات إبليس
حزيمك فى بقعه حفرا حفرا.. كتيرة الحركه قليلة البركه.. نسوانها بيحكموا على
رجالتها وشبابها أبيع من بناتها.. الفقر فيها صايح والحق فيها ضايح!

وراح مديله شلوت طار فى الهوا سبعين ساعه وساعه ونزل تحت المنجايه الهنديه
فى جنينه جدى البيه الشوادفى.

دلوقتى خلاص راح أبويآ على.. وتحرمى علينا يا جنينه البيه وإنتى يامنجايه هنديه
خلاص.. مابقاش تحتك إلا الرماد فى راكبه النار اللى ماتت.. وكوز السلمون
المصرى انكفى على وشه.. لآحس.. ولا خبر.. ولا روح.

ونقلنا ملاعب النهار وسهرات الليل للعلوايه.. قدام بيت الحاجه سنيه بنت عمى
وأخت عبد الله تاجر التموين.

والعلوايه كانت ساحه واسعه رمليه بتفصل بين عزبه أبو نجم وعزبه القوادره
المنتسين لعبد القادر ابن بدره جارية سيدى البيه الشوادفى اللى اتجوزها وهى معاها
عبد القادر لسه طفل وبعد كده خلف منها عبد الحميد وعبد المجيد وعطيه غير البنات
اللى طلوعوا كلهم بيض.. بينما أخوهم من الأم كان أسود فطلعت ذريته كلها سوداء
من غير سوء.. وكان أبويآ عثمان أبو سعيد غريمى فى الهوى مسميهم الملونين
وكانت العلوايه مساحه أوسع وفرصه أكبر لتجمع عددآ أكبر من العيال أكثر من اللى
كانوا بيتجمعوا تحت المنجايه الهنديه حوالين أبويآ على.

وحصلت خلطه عجيبه على رمل العلوايه واتولدت التريبطات والتقسيمات اللى اتأصلت بعد كده فى القلوب والبيوت والغيطان.

الفقرا من شباب أبو نجم التحموا بشباب القوادره والسواله رغم تباعد الدم والسكن.. وكونوا جبهه موازيه لجبهه شباب أبو نجم الملاك، وبقت التقسيمه بوضوح ملاك ضد معدمين.

وطبعاً اندماجى فى جبهه المعدمين ماعجبش أعمامى وأخوالى من آل نجم وكنت دائماً أسمع اللوم والتوبيخ أينما توجهت:

- يا عويل يا هايف.. سايب بيوتك فى العزبه وقايم نايم عند العبيد.

لكن أمى الله يرحمها كانت بتشجعنى على الاندماج أكثر فى جبهه المعدمين.. ولما كانوا عمامى يسلطوا على دلدولهم عبد العزيز أخويا كانت بتتصدى له.. مره قالت له:

- إن كنت يا خايب يا ابو رياله فاهم إنهم واقعين فى هواك تبقى بتحلم.. وإن كنت منشئ على جوازه منهم حيطلع نقبك على شونه.. وادى مقصوصى اللى ما حدش علم عليه.



كان الفراغ اللى سابه أبويا على بموته فرصه لظهور الصراع بينى وبين غريب على زعامه العيال..

وغريب كان مندوه باسم أمه فاطمه أم تهاى.. ودا مقصود بيه الإهانه والتحقير لأن اللى بيتنده باسم أمه واحد من اتنين يا إما تربية أرمله يا إما تربية مره متسلطه وأب مسلوب الشخصيه وفى الحالتين:

- عمر المره ماترى عجل ويحرت.

وأول مره أنا اتندهت باسم فؤاد ابن هانم من ولد كنت باضر به، ولما سألت أمى عن الموضوع ده قالت لى:

- إمشى قطع لسان اللى يقول عليك كده.. دانت أحمد فؤاد ابن عزت أفندى على سن ورمح.. أنا صحيح مره لكن مقصوصى ده يسوى ميت شارب.
بعد كده كان أى عيل يقول لى العباره دى كان بيدفع الثمن من صحته فوراً وأحياناً من منظره.

عمنا غريب بقى ماكاتش بياخدها على إنها إهانه.. بالعكس دا كان مصدر فخره دائماً إنه ابن أم تهاى!.. ليه بقى؟!.. اسمع وصلّى ع النبى:

- جدته أم أمه كانت خدامه فى سراية جدى الحاج عطيه الأخ الأكبر للبيه الشوادفى.. كان هو العمده وكان التليفون والعز فى سرايته ولما مات اتنقلت العموديه بتليفونها وعزها لسراية أخوه الأصغر محمد بك الشوادفى حامل عالمية الأزهر والحاصل على رتبة البكويه مرتين.. مره من الخديوى عباس.. ومره من الملك فؤاد فاعتبر نفسه باشا إلا ربع وأتارى ياخويا الرتب بتاعه زمان دى كانت بتحتاج لفلوس كتير لزوم الأببه والمنظره.. وميراث جدى البيه الشوادفى عن أبوه مايكفيش خصوصاً وإنه كان هارى نفسه جواز وخلفه فبقى مسئول عن مؤونه جيش عرموم من الأبناء والبنات والأحفاد والحفيدات.. يقوم يشاء السميع العليم إن جدى أبو أبويا المدعو محمد أبو محمد أبو نجم يطلع هو الأخ الشقيق الوحيد لمحمد بك الشوادفى الأببه.. فلما مات أبوهم.. استلم البيه الشوادفى حصته وحصه أخوه الأصغر محمد وعين نفسه وصى على محمد الصغير.

قوم إنت يا عم محمد يا صغير فوت عيلينك لحمه حمرا.. إبراهيم ١٥ سنه.. وعزت ١٣ سنه.. واطلع لى الحجاز عشان ترجع من هناك الحاج محمد.

لأ وكمان ما استكفاش بكده.. بسلامته بعد ماخذ رتبه حاج وراجع بقى.. مات فى المركب ورموه مع الزباله فى البحر.. حاجه خرا يعنى.. هى برضه أصلها لما بتغفلق ما بدّهاش.

وطبعاً جدى البيه الشوادفى بلع العيلين اليتامى خصوصاً بعد أمهم ما رمتهم وراحت التجوزت وعلشان يخزى العين خدهم ع الجبل وقاس لهم أربعين فدان من

أرض الدوله وقال لهم:

- دول نصيكم فى الميراث.. صلحوهم وخدوهم.

وحسب روايه أمى:

- فضلوا بيعوا جزء ويصلحوا بحقه جزء تانى لغايه العبارة ما صفصفت على سبع فدادين مستصلحين.

أبويا باع التلاته ونص تبعه واشترى أوتومبيلين واحد له هو والمدام اللى هى أمى والتانى للعيال اللى هما احنا واللى فضل من حق الأرض شبرق بيه ومنجه نفسه.. نيجى بقى للأوتومبيلين فيكتشف السيد الوالد الأهل إنه يحتاج لاتنين سواقين يمشوا العجل وطبعاً دا مش فى مقدوره فباع الأوتومبيلين ورجع شبرق بيهم ومنجه نفسه تانى.. وفضلوا التلاته ونص بتوع أبويا إبراهيم ينزرعوا إلى يومنا هذا.

نرجع لغريب وجدته اللى كانت خدامه فى سراية العمده الحاج عطيه وكان جوزها بيشتغل معاها فى نفس الموقع كلاف.. يعنى مسئول البهايم لامؤاخذه وكان جدى الحاج عطيه أبو نجم نموذج للفحوله.. اتجوز تلتاشر وخلف حوالى خمسه وأربعين غير السقط واللى مات صغير!

وكان أفخم وأحلى مرا فى سجل الفحل المذكور هى الحاجه زينب آخر النسوان التلتاشر وأقواهم.. سيطرت على الفحل وهو بيلعب فى الوقت الضايح وكوشت على كل شىء لكن على رأى الرئيس السادات:

- بالقانون.

لأنها بالصلاح النبى استطاعت فى التمن سنين الأخرى من حياة الفحل إنها تجيب تسع عيال!

ومن النوادر اللى بتحكى ليومنا هذا إن الزميل الفحل مات والحاجه زينب حامل.. ولما جم يقسموا الميراث اختلفوا.. يحسبوا اللى فى بطنها ولد ولا بنت.. هى قالت:

- ولد.

وهما اللي هما ولاد ضرايرها قالوا:

- بنت.

واحتدم الخلاف وأخيراً لقيوا واحد عاقل نصحهم بالانتظار لحين الولاده.. ويوم
الولاده حصلت المفاجأة الزينية.

الحاجه زينب جابت عطيه وعطيات.. شوف المرا؟



الحاجه زينب ليله فرحها جوزت خدماتها جده غريب لكلاف البهايم جد غريب
برضه.. وفضلت الحاجه تخلف وخدماتها تخلف لحد ما زحموا البلد.

من اللي خلفهم تهامي الكلاف بنت اسمها فاطمه طمعت فيها الحاجه زينب
وفضلت تربيتها لغايه ما بقى عمرها ست سنين.. استلمت الشغل وصيفة الحاجه
زينب شخصياً ودا في حد ذاته امتياز على سائر خدم السرايه تاكل فضلات الحاجه
وتلبس قديم الحاجه وتعيش بجوار الحاجه.. كبرت البنت بسرعه وخرط البنات
خرطها ودارت واستدارت وأتقسمت ورا وقدام وطرح الرمان على صدرها وطاب
واستوى وطلب الأكال.

في هذه الأثناء كان أبويا عثمان أبو سعيد مرمى في السرايه عليل.. كان عنده
شلل من نوع غريب.. المفروض الشلل النصفى يبقي يا إما فوق.. يا إما تحت.. لأ..
دا بقى كان عنده شلل نصفى بالطول وياريت مثلاً الشلل ضارب نص يمين أو
شمال.. دا كان إيده اليمين ورجله الشمال هما اللي مشلولين يعني متكثف تكتيفه
مخبرين وسبحان الله - له في ذلك حكم!.. لأن اتضح بعد كده إن المذكور يستاهل
كل خير وإن التكتيفه دي شويه على معروفه كان دا هو الأكال اللي طلبه رمان صدر
الوصيفه فانتهاز أول فرصه اختلى فيها بفاطمه أم تهامي وقزح عليها زي طور
الطلوقه وتحبل البنت الخدامه ويستندل الفاعل وتستندل الحاجه زينب زي أفلام

المرحوم حسن الإمام وعشان يداروا الفضيحة جابوا جثته راجل مريض مرميه جنب الجامع واسمها سيد أبو يوسف وكتبوا على فاطمه وهي حامل باسم سيد أبو يوسف مريض الجامع وتصمم فاطمه إنها تسمى المولود «الغريب» وقبل ما تسجِّع الوالده يطردوها برا السرايه.. وتعمل فاطمه من حضنها سكن لجوزها المريض وطفلها الغريب اللي أصبح ابنها وجوزها وأخوها وأبوها.

اشتغلت في البيوت والغيطان بإديها وسنانها عشان تربي الطفل وتعالج المريض ويكبر الطفل ويطلع متعلق بأمه ودود وحنين مع أبوه المعلن سيد أبو يوسف ويعامله بمنتهى الاحترام زي ما اتعلم من فاطمه العظيمة.

وتروح الأيام وتيجي ويستمر القدر في هزاره الشقيل البايخ ويشاء السميع العليم إن مريض الجامع يعيش ويشوف بعنيه الإنسانه اللي حافظت عليه وعاشرته بكل الحنان والحب وهي جثه بلا روح.. يعيش سيد أبو يوسف ويشوف فاطمه الحبيبه وهي بتموت!.. كانت أول مره نسمع فيها صوت أبو يوسف.. فضل يبص لها ويثن ودموعه نازله تسح وبعدين عوى زي الديب وشق الجلابيه اللي ساتراه نصين وصرخ من بين دموعه:

- الله يجازيك يا موت.. يا عريس الخلوين «ورجع سكت لحد ما مات».. أنا كنت حاضر لحظات احتضار فاطمه أم تهامي وسمعت آخر كلامها للغريب.. قالت له وهو واخدها في حضنه ويسقيها الدواء:

- أنا عارفه ياخويا مجروح وموجوع.. حقك على أنا يا غريب حقك على راسي يا خويا.. ولو إنت بتحب أمك صحيح.. دير بالك على أبوك السيد عشان خاطري.. دا غلبان لا بإيده ولا بالمنجل.. داهو حتى اللي سماك الغريب.. حتوحشني يا غريب.. قلبى وربي راضيين عنك يا بنى.. دير بالك على روحك يا حبة عين أمك.



وشلنا خالتي فاطمه أم تهامي على كتافتنا تلاته كيلو عشان ندفنها في جبانة الشيخ

عثمان فى العباسه كانت خفيفه زى الريشه.

وصلنا بأمان الله وفتحنا القبر وقبل ما ننزلها خدنا غريب بالكفن فى حصنه وباس الكفن وملس عليه بحنان وناوله للتربى وهو يقول له:

- سمى عليها يا عم محمود.. اسم الله عليكى يام الغريب.. حتوحشيني يامه مع السلامه.. مع ألف سلامه ياختى.

وصدرت عنه زفره مرعبه قبل ما يدبر وشه عننا ويقول بصوت مخنوق:

- الله يجازيك يا موت.. يا عريس الحلوين.

